



Broj, 01-07-10-51-261/2024
Sarajevo, 27.11.2024. godine

Na osnovu člana 25. stav (1) u vezi sa članom 26. stav (4) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Katice Jozak-Mađar, [REDACTED], [REDACTED], [REDACTED], od 19.11.2024. godine, predsjednik Visokog sudskog i tužilačkog vijeća Bosne i Hercegovine donosi

RJEŠENJE

Odobrava se pristup informacijama o razlozima ponavljanja konkursa za poziciju sudije Vrhovnog suda Federacije Bosne i Hercegovine broj: 04-07-3-188-1/2024 od 15.01.2024. godine, koji je zatvoren 30.01.2024. godine.

Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 19.11.2024. godine zaprimilo zahtjev Katice Jozak-Mađar, [REDACTED] (u daljem tekstu: podnositeljica zahtjeva) za pristup informacijama u vezi sa njenom prijavom na javni konkurs broj 04-07-3-188-1/2024 od 15.01.2024. godine koji je zatvoren 30.01.2024. godine, a koji se odnosi na jednu poziciju sudije Vrhovnog suda Federacije Bosne i Hercegovine. Konkretno, tražena je odluka Vijeća u vezi sa njenom prijavom podnesenom u ovoj konkursnoj proceduri i razlozima zbog kojih nije izabrana na navedenu poziciju, a bila je prvorangirani kandidat prema objavljenoj rang listi.

Razmatrajući predmetni zahtjev, u skladu s nadležnostima VSTV-a BiH, utvrđeno je da VSTV BiH posjeduje informacije navedene u izreci ovog rješenja, te da omogućavanje pristupa istim nije protivno odredbama Zakona o slobodi pristupa informacijama na nivou institucija Bosne i Hercegovine ("Službeni glasnik BiH" 61/23; dalje u tekstu: Zakon).

Uvidom u službenu evidenciju, utvrđeno je da je VSTV BiH, 5.6.2024. godine, na web stranici <https://pravosudje.ba> u kategoriji Konkursi/Sudovi i tužilaštva/Otvoreni konkursi za sudove i tužilaštva, odnosno na liku: <https://vstv.pravosudje.ba/vstvfo/B/141/article/135957>, objavio Informaciju o ponavljanju konkursa za pozicije objavljene javnim konkursom broj: 04-07-3-188-1/2024 od 15.01.2024. godine, koji je zatvoren 30.01.2024. godine, a koji se, između ostalog, odnosi i na jednu poziciju sudije Vrhovnog suda Federacije Bosne i Hercegovine, koja je predmet interesovanja podnositeljice zahtjeva.

Naime, Vijeće je na sjednici održanoj 4.6.2024. godine donijelo odluku o ponavljanju konkursa za poziciju sudije Vrhovnog suda Federacije BiH na osnovu člana 62c. stav (1) tačka b.) a u vezi sa članom 59b. st. (2), (3) i (4) i članom 48a. Poslovnika Visokog sudskog i tužilačkog vijeća Bosne i Hercegovine („Službeni glasnik BiH”, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24) iz čega jasno proizilazi da je ovaj konkurs ponovljen jer između kandidata koji su mogli biti predloženi za imenovanja u skladu sa pravilima iz člana 59b., a uključujući i podnositeljicu zahtjeva, nije bilo kandidata koji su podobni za sudijsku, odnosno tužilačku funkciju.

Postupajući po zahtjevu podnositeljice, a u skladu sa svim gore navedenim, odlučeno je kao u dispozitivu ovog rješenja.

Pouka o pravnom lijeku:

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnositeljici zahtjeva
2. Odjelu za imenovanje i napredovanje
3. U spis